



Le vieux pont.

Le véyé pont

Dos l'airtche di véy' pont mousru
Ais l'en â pésaie de l'ave çiaire;
Neut ais djoé lais tchainson di ru
Da cin-cent ans ne tchaindge diaire.

Ça touedge le mairmeugeain bru
Que brece c'ment stu d'in diïndiaire;
Dos l'airtche di véy' pont mousru
Ais l'en â pésaie de l'ave çiaire.

Taint de coupyes d'aimoireux drus
S'y sont d'jurie d'aidé se piaire;
Tos ces serments qu'ais f'sïnt trétus
S'en sont allaie aivos l'ave çiaire
Dos l'airtche di véy' pont mousru.



*Autour de la fontaine
du Village.*

Atoé di bené

Ais faie chi bon, le soi, atoé de lais fontaine,
Ditant que les sayats tchu l'adgeat aitendant,
Ecoutaie les novés de tote lais heutaine,
Que, d'ïn air entendu, les fannes raicontant.

Le traivaiye à rédu, et sain lais moindre dgeaine,
Chu tos les dgens di yüe les langues s'ébaittant;
Ais faie chi bon, le soi, atoé de lais fontaine,
Ditant que les sayats tchu l'adgeat aitendant.

L'ave baidgeule achi sais piaintive rengaine,
En tchoéyain di goulat. Et tos ces brus montant
Dains lais neu, k'ment des sons de djoyeuses tiainpaines
Tiaïn les sayats tot piains, tchu les têtes bardant.
Ais faie chi bon, le soi, atoé de lais fontaine!



Le moulin.

Le melin

Le djoyeux tic-tac di melin
Monte a ciil c'ment ainne prayiere
Et révoiye tot a maitin
Le mouenie aivos lais moueniére.

Les meules meuyant le grain fin,
Lais rue schlapotte dain lais r'viere;
Le djoyeux tic-tac di melin
Monte a ciil c'ment ainne prayiere.

Tiain d'in long voyaidge an revint
A pays finir sais carriére,
An s'airâte a contoé di tch'min,
Et le tiuer recoignât lais tiere
A djoyeux tic-tac di melin.



Tin-le bon!

I t'niô dain mais main in oueg'lat
Chi dru et de chi bé pieumaidge,
Que çiotraie des airs chi douç'lats:
I poéyo l'embrue dain mais caidge;

I v'lai djôtaie, c'ment in fôlat:
Ais s'envoulai: ah! qué dammaidge!
I t'niô dain mais main in oueg'lat
Chi dru et de chi bé pieumaidge.

Ais s'envoulai tchu in saipplat,
Et tchaintai dain son doux langaidge:
Baichattes, tchu vos sïns rondlats,
Serraie-le et prente bin diaidge,
Ttain vos t'nis en main in oueg'lat!



La chapelle

Lais petéte tchaipelle

Dain lais petéte tchaipelle,
Tôt l'enson, a car di bos,
An y breule des tchaindelles,
An y pend des ex-vôtos.

An y dit des ribambelles
De litainies, de crédos,
Dain lais petéte tchaipelle,
Tôt l'enson a car di bos.

An y voit veni les belles,
Des galants poi derie yos ;
Tôt en prayain, les donzelles
Léchant tchoir in dgentit mot,
Dain lais petéte tchaipelle.